


特別
ル5
1570
13





1570
卷 13



寧波府志卷二十九 傳五

南京兵部尚書郡人張時徹纂修

寧波府知府蜀威遠周希哲訂正

列傳四

唐樂仁規定海人唐光化間任兵部尚書贈金紫

光祿大夫弟仁厚刑部尚書贈銀青光祿大夫

宋史浩字直翁鄞人祖父詔善孚閭里民有鬪訟

常從詔求直不復訟官府以八行科徵於朝不應

浩以南省前行當得教官浩願習民事初補餘姚

縣尉浩爲國子博士時建普安恩平二王府即除
祕書郎兼普安郡王府教授上嘗命普安王書蘭
亭叙五百本以進浩曰此趙鞅訓戒之旨王溢其
數以進上復賜宮女十人侍王浩曰當以庶母禮
事之王如其言高宗益賢普安遂爲皇子封建王
浩之力也完顏亮寇江上將親征建王上奏請將
兵爲前驅浩時在告力疾詣府啓王曰昔唐肅宗
能從明皇幸蜀安有靈武事王大驚亟具奏謝罪
遂從高宗視師以歸由是立爲太子普安即位是

爲孝宗浩遷中書舍人十日爲翰林學士逾三月
參知政事明年拜尚書右僕射同中書門下平章
事兼樞密使孝宗銳意恢復中原張浚屢奏取山
東開都督府請上幸建康浩力與浚廷辯謂帝王
之師當出萬全豈可嘗試以圖僥倖且曰太上倦
勤禪位陛下若奉以行太上寧能俱往都城一有
驚動陛下何以處太上孝宗悟其言後竟繇禁中
命邵宏淵等出兵浩語僕射陳康伯曰吾屬兼樞
密兵出不與聞將言用相哉遂丐罷爲御史王十

朋論劾出知紹興浩歸甫十四日符離師潰凡一
十三萬人浚上表自劾浩復勸上速議和後知紹
興府復判福州淳熙五年拜右丞相七月即罷浩
再相時朱熹教授生徒於建寧山中浩力挽之出
守南康浩雅度涵蓄凡議毀浩者悉獎引之如陳
之茂與郡莫濟掌內制皆上所異也又嘗薦陸游
賜進士出身在經筵薦薛叔似楊簡陸九淵葉適
袁燮等十五人又薦金安節汪應辰等三十四人
後皆通顯兩授節鉞遍歷三公壽八十九始諡文

惠後更忠定追封越王歷官表奏皆手屬藁老猶
不倦文集五十卷號真隱漫錄論語口義二十卷
尚書講義二十二卷周官講義十四卷論者謂其
宅心平恕而不能相其君恢復之謀君子少之長
子彌大終禮部侍郎力學勵行著衍極朴語諡獻
文彌正敷文閣待制彌遠字同叔忠定罷相歸東
湖與弟彌堅先後生忠定深器之嘗曰吾口不言
兵後必有爲宰相者二子優劣吾未能審也一日
携客游湖寺二子從忠定陰戒從者進食踰晡時

彌遠凝坐無怒色忠定益竒之登王容榜進士折節下士與東萊呂祖謙游從忠定既卒以大理司直遷諸王宮大小學教授出知池州提舉浙東常平入爲起居郎兼資善堂直講權禮部侍郎韓侂胄師敗江淮蜀吳曦反彌遠與皇子榮國公密議入啓皇后召夏震傳詔殛殺之初餘杭趙汝讜汝談集歷代皇后事號曰坤鑑進后禁中后頗向之會彌遠議誅侂胄后意遂移而汝談兄弟終彌遠世不得入朝嘉定元年知樞密院事後拜右丞相復故相趙汝愚呂祖泰等官召林大中樓鑰等故老十五人入朝十五年皇子榮國公薨立濟國公竑爲皇子時彌遠久居相位頗不自安竑好鼓琴彌遠買美人善鼓琴者納諸御殿竑動息竑甚嬖之嘗指瓊厓地圖他日欲以竄彌遠又呼彌遠爲新恩以他日非新州則恩州也語寢聞彌遠惡之乃密以越州宗室子與莒爲沂王後更名貴誠援高宗立普安恩平二王故事將復立爲皇子十七年八月會寧宗大漸亟白皇后言貴誠賢德皆先

帝猶子遂宣遺詔立爲皇太子即帝位是爲理宗
卒誅濟王復爲相十年擅權用事專任儉人議者
羣起攻之而彌遠反用李知孝梁成大爲鷹犬一
時君子貶斥殆盡紹定二年薨於賜第贈中書令
追封衛王諡忠獻彌遠子宅之戶部尚書幼子宇
之觀文殿學士宇之謙儉不事紈綺冬月居敗屋
葛屨弊衾士論賢之彌堅別有傳

鄭清之字德源鄞人登嘉定十年進士第母胡氏
將就蓐二日甑鳴甫生嫡母欲不舉丘嫂邊氏請

於舅姑願已乳之既貴奉邊氏如母卒爲服朞以
報教授峽州江陵帥趙方善風鑑夜夢有告者曰
明日當有貴客至宜敬禮之厥明典客以峽州教
授謁入方從廳屏窺清之狀貌鰲瘠短小不稱所
夢賓次坐逾日旻方往來諦視之危坐迄不惰方
大器服且曰公它日大貴願以二子相累初召爲
國子錄史彌遠密語之曰皇子不堪負荷聞後沂
邸者甚賢君善訓迪之事成彌遠之坐即君坐也
言出於彌遠之口入於君之耳若一語洩者吾與

寧波府志卷二十九
五
君皆族矣即除清之魏憲王府教授遂極力翼贊
寧宗崩以嗣子即帝位是爲理宗寶慶元年除起
居郎逾年權給事中進翰林學士未幾拜簽書樞
密不十年爲丞相遂召真德秀魏了翁崔與之趙
汝談徐僑尤焞洪咨夔王遂李宗勉杜範游侶袁
甫李韶凡數十人爲侍從是爲端平元年三年行
明堂禮九月大雷電罷家居凡十年淳祐五年入
朝拜奉國軍節度使兼侍讀已乃拜太傅右丞相
進左丞相封魏國公致仕越六日卒封魏郡王諡

忠定清之以定策功四登相位端平之間召用正
人號小元祐至再相則年齒衰暮政歸妻子而間
廢之人多因緣以賄進爲世所少云
史嵩之字子由魯祖木建炎元年金寇猝至率姑
姊毋妻五族暨其鄰保航海得完者踰二千人木
孫五人皆登進士第嵩之少儻喜經濟嘗與內
弟陳埴講學山寺寺僧厭之嵩之怒夜焚其廬嘉
定十三年登進士第紹定五年歷遷大理卿兼權
刑部侍郎升制置使兼知襄陽府六年遷刑部侍

郎仍舊職端平元年乞祠進寶章閣直學士提舉
太平宮歸養田里尋以華文閣直學士知隆興府
兼江西安撫使乞祠進寶章閣學士兼制置等使
嘉熙元年進華文閣學士兼安撫制置等使二年
拜端明殿學士職任仍舊恩數視執政詔入覲拜
叅知政事督視諸道兵已又拜丞相加樞密都督
四年入相眷顧特隆賜賚無虛日淳祐二年進金
紫光祿大夫加食邑封永國公會父彌忠卒將起
復三學交論之未幾臺諫合疏服闋勒致仕居家

十三年而卒贈少師安德軍節度使諡莊肅德祐

初以右正言徐直方論奪謚初嵩之從子璟卿嘗

以書諫曰

伯父乘天下之大任必能成天下之大事

所行寔不克終用人之法不待舉刺而以官者有
之譴責未幾而旋蒙叙理者有之丁難未幾而遽
被起復者有之借曰有非常之才有不次之除醜
恩異賞所以收拾人才而不知斯人者果能運籌
帷幄獻六奇之策而得之乎抑亦獻賂幕賓而得
之乎果能馳身鞍馬效一戰之勇而得之乎抑亦
效顰奴僕而得之乎徒聞苞苴公行政出多門便
嬖私昵狼狽萬狀祖宗格法壞於今日自開督府
東南民力困於供需州縣倉卒匱於應辦輦金帛
輓蜀粟絡繹道路曰一則督府二則督府不知所
幹者何事所成者何功近聞蜀川不守議者所歸
退師於鄂之失何者分戍列屯備邊禦戎首尾相

援如常山之蛇維揚則有趙蔡廬江則有杜伯虎
金陵則有別之傑為督府者宜據鄂渚形勢之地
西可以援蜀東可以援淮北可以鎮荆湖不此之
圖盡捐藩籬深入堂奧伯父謀身自固之計則安
其如天下蒼生何是以饑民叛將乘虛擣危侵軼
於沅相搖蕩於鼎澧若江陵之勢苟孤則武昌之
勢未易守荆湖之路稍警則江浙之諸郡焉得高
枕而臥况殺降失信則前日撤疆之計不可復用
矣內地失護則前日清野之策不可復施矣此隙
一開東南生靈特几上之肉耳則宋室南渡之疆
土惡能保金甌之無闕也蓋早為圖上以寬九重
宵旰之憂下以慰雙親朝夕之望不然師老財殫
績用不成主憂臣辱公論不容萬一不長強禦之
士繩以春秋之法聲其討罪不効之咎當此之時
雖欲優游菽水之養其可得乎異日國史載之不
得齒於趙普開國勲臣之列而乃廁於蔡京誤國
亂臣之後遺臭萬年果何面目見我祖於地下乎
人謂禍起蕭牆危如朝露此愚所痛心疾首為伯

父若曰極言為今之計莫若盡去其入幕之群小
悉召在野之君子相與改弦易轍戮力正事庶幾
失之東隅收之桑榆矣如其視失而不知救視非
而不知革薰蕕同器駑驥同槽天下大勢駸駸日
趨於危亡之域矣伯父與環卿親猶父子也伯父
無以少年而忽之則吾族幸甚天下生靈幸甚我
祖宗社稷幸甚君無何璟
卿暴卒相傳嵩之致毒云

宣繒 鄞人嘉泰三年太學兩優釋褐授太學博士
歷仕至嘉定十四年同知樞密院事兼參知政事
明年拜參知政事以資政殿學士奉祠端平三年
召赴闕陞太學士提舉洞霄宮以觀文殿大學士
致仕卒贈少師詔繒嘗預定策以王堯臣故事贈

太師諡忠靖

余天錫字純父昌國人登嘉定十六年進士第祖父滌教授史浩子孫因居于鄞天錫亦爲彌遠府童子師性謹愿絕不與外事彌遠器重之時彌遠在相位父皇子竑深嫉之彌遠不自安念欲有廢置而近屬無可嗣者會沂王宮亦無嗣丞相欲借是陰立爲後備天錫試于鄉秋告歸彌遠密語之曰今沂王無後里中宗子賢厚者幸具以來天錫渡浙抵越西門天大雨過全保長家避雨保長知

其爲丞相館客具雞黍甚肅湏臾有二子侍立天錫異而問之全曰此吾外孫趙與莒與芮也日者嘗言二雛後極貴天錫因憶彌遠言還臨安以告遂召見彌遠善相大竒之遂密諭與莒還其父家天錫母朱氏爲沐浴教字禮度益閑未幾召入嗣沂邸迄即帝位是爲理宗寶慶元年超除起居郎不數年拜叅知政事復守鄉郡母夫人封周楚國夫人壽過九十將以生日拜天錫爲相天錫以病卒贈太師諡忠惠第天任爲兵部尚書兄弟友恭

方貧時率更衣以出終歲同衾及晚貴盛復約以昭穆同葬

國朝金忠字世忠鄞人慷慨豁達負氣岸善謀畧先戍趙州薄游至燕神於卜事適文皇舉義靖內難忠以布衣召見署紀善同姚廣孝運籌潛邸明年署長史從征又明年上正大寶拜工部右侍郎陞兵部尚書詹事府詹事國家大政多出裁決上初議建儲武臣丘福等咸謂次子高煦有扈從功請立之忠獨言嫡長之義不可廢議定遂

命忠輔導斥邪去佞務引當道上以忠老成正直命兼輔皇孫尤見優待里居時嘗爲人所侮其人後補吏來京懼弗釋怨忠以其才薦用之忠事上敬慎每承顧問知無不言退未嘗少泄遇同列論事不苟阿壽六十三以遽疾卒逾十載仁宗嗣位追贈榮祿大夫少師謚忠襄官其子達爲翰林檢討賜歸依親讀書正統十一年驛召至京改禮科給事景泰初元遷都給事中剛直敢言無所避忌儉少多憚之二年陞長蘆都轉運鹽使

袁珙字廷玉鄞人元翰林檢閱官士元子自幼勵精儒業博覽郡書得相人之術識真主於燕邸舉靖難師言皆驗拜太常寺丞後以省墓還家卒賜葬祭贈太常少卿子忠徹蚤傳珙術授鴻臚序班成祖嘗勉之進學陞尚寶丞復諭使親詩書庚申改中書舍人已丑新營北京忠徹扈從每預大議後奔父喪葬畢復召赴京扈征瓦剌丙辰陞少卿再扈從北征洪熙改元賜還家宣德初復起前少卿後隨駕北征復侍英宗己未上章乞歸

卒父子占事皆奇驗語在特藝傳中珙性剛方自少安貧養志篤於孝友親疾甚則顛天析減年以益親壽後疾果瘥有以役他徙者委之金百鎰不相聞者十餘年後其人歸以金還之封識如故友人以事逮而歿珙收厝以歸其母立朝小心慎密每建言爲上所眷愛後居家好吟咏所著有柳庄詩集忠徹侍文皇每建議切直無所回互如諫遣使取寶諫武職宜隄終喪諫弗服方士藥諫輔導太子宜選文學老成之臣皆爲讜論有鳳池

吟稿符臺外集拙休稿子應驤治書嘗以父所纂人象大臣進呈因賜錄用授鴻臚序班

陳恭字孟起從其叔陳遠徙家于鄞舉永樂乙酉鄉試與修大典歷政秋官出判興化府事陞工部營繕司郎中政咸稱最宣廟時超拜大理寺右少卿時有男子嗜酒者妻苦諫逆耳而男子尋醉自剄有司以妻威逼論死獄移大理恭廉得其情欲原之而柄刑者必不可恭寢不成寐徬徨達榻行遂表請乞去卒貸其人轉左通政英廟時進

工部右侍郎已又進尚書飭材節費百度維艱景帝時眷注尤渥懇乞骸骨以歸人以知止稱之未幾卒賜諭祭營葬

秦鉞字懋功慈人正德甲戌進士爲湖廣攸縣知縣政績有聞進監察御史巡按江西監臨乙酉鄉試取士多得人陞徐州兵備副使丁憂服闋補江西九江兵備陞山東叅政按察使左右布政使才識通敏敷歷著聲擢副都御史巡撫江西召入內臺不數月乞歸而卒

徐錦字章甫慈谿人舉進士爲甌寧令以撫字著聞爲監察御史按廣西威名大振歷陞都御史巡撫順天先事慎防夷情讐服撫養士卒得其死力邊塵不驚方以公輔期之而引疾乞休皆服其勇退云

趙文華字原實慈谿人幼穎異爲舉業時出古格不作世俗語第嘉靖己丑進士爲兵部主事力追古作蔚然成章然性素豪宕不拘小節謫東平州州同已而復起爲南京稽勲主事改刑部主事歷陞通政司使工部侍郎時東南倭寇繹騷奉命督察有功進太子太保工部尚書會內逆徐海又勾夷爲患再上疏請討率先戎行卒又破賊加少保已而以疾乞骸罷免遂卒

司馬氏曰爵以馭貴祿以馭富帝王所以宰造區宇鼓役群動官人能而熙庶績也賢豪俊髦進都通顯蟬聯鵷造以明得意古今人夫豈少也語云凌風厲翮恣意所存激印萬乘之主一言取卿相之位雖其人之智力哉亦會其時焉已世固有抱

寧波府志卷二十九
德明道而白首牖下余悲其君專寵獨任不能揚
休流潤余悲其臣是故耕野釣海之夫遽難以齷
齷棄之而乘軒列鼎叱咤風生者未必皆赫赫曜
也吁可念哉

寧波府志卷二十九

寧波府志卷三十

傳六

南京兵部尚書郡人張時徹纂修
寧波府知府蜀威遠周希哲訂正

理學

宋楊適字韓道慈谿人淳厚介特容儀偉然治經
不事章句黜浮屠老氏之說善言治道歷究治亂
之原人有善則稱之不善如未之聞爲學務力行
唯恐爲人所知毀譽榮辱不以動其心人莫得而
親踈鄉人憚之相語不以名氏尊之曰大隱先生

衣食纔自給非義之餽一介不取躬耕養親族之
貧者分賑之隣有盜其稼者人告之適愀然曰彼
窮厄求拯其生爾勿治也盜聞之慚悔無敢侮者
孫沔自諫官出按浙東西刑獄召之不赴遂之越
始友錢唐林逋後與同郡王致杜醇爲友退處四
十年行高望重宋仁宗詔求遺逸太守鮑軻以名
聞賜行粟帛太守錢公輔又薦之授將仕郎試太
學助教州遣從事致書袍笏輿從迎之辭不受遯
大隱山壽七十六

王致字君一鄞人與楊適杜醇爲友俱以道義化
鄉里諸生子弟師尊之皆稱爲先生嘗與牧守言
政事王安石復書曰無事於職而愛民若此可以
爲仁矣年踰七十樂道安貧妻收遺棄子拾墮薪
浩然無悶鄉人莫不高其行仁宗朝詔天下立學
有文材道義者與本州校官致辭不受後召爲秘
書省校書亦不赴宰臣陳執中奏錄致文得一百
八十篇藏之秘閣卒葬邑之棲鳳山人尊稱曰鄞
江先生荆公誌墓曰四明士大夫立言以垂後世

者自先生始云

杜醇越之隱君子居慈谿學以爲己隱約不求知孝友稱于鄉里耕桑釣牧以養其親經明行修學者以爲模楷慶曆中鄞始建學縣令王安石請爲之師不赴再書強起之醇始就焉慈溪令林肇立學又起醇爲師亦固辭安石又作師說以勉之二邑文風之盛自醇始

王說字應求鄞人王致門人也弟該登慶曆六年進士第說隱居教授餘三十年建書院於桃源鄉

熙寧九年神宗特恩補將仕郎爲州長史御書桃源書院四大字賜之說無田以食無桑麻以衣怡然自得子孫世其家子珩宗正少卿孫勲廣南市舶一錢之利皆歸有司不識舶貨之名及卒賈胡率錢二百萬爲賻子正已却之曰吾父以廉直聞雖貧猶能負喪以歸不愧廉叔度也清白之傳實先生家訓正已終大府鄉

樓郁字子文自奉化徙鄞卜居城南志操高厲學以窮理爲先爲鄉人所尊屢空自樂慶曆中詔郡

縣立學延致鄉里有文學行義者爲之師郁掌教
縣庠者數年又教授郡學前後三十餘年學行篤
美信於士友一時英俊皆在門墻最知名者豐稷
袁穀羅適郁登進士第調廬江主簿自以祿不及
親絕仕進意以大理評事終于家有遺集三十卷
贈正議大夫子孫皆踵世科五世孫鎰德行文章
爲時名臣仕至叅知政事以上稱慶曆五先生

袁燮字和叔鄞人生而端粹專靜乳媪置槃水其
前玩視終日夜臥常惺然稍長讀東都黨錮傳輒
以名節自期入太學見陸九齡遂師事之同里沈
煥楊簡舒璘皆聚于學朝夕以道義切磨第進士
爲太學正時名儒朱熹輩皆斥燮知不爲時所容
尋以學黨去更歷外服入朝至太常丞兼考功郎
知江州提舉江西常平以都官郎召遷司封又遷
國子司業祭酒延見諸生迪以切已之學聞者興
起以秘書監兼崇政殿說書遷禮部侍郎侍講兼
祭酒每講必託義以諷立朝守正不阿議者指爲
好名遂奉祠以歸著述弗倦或勸宜少休曰吾以

此爲笙鏞管磬不知其勞也終顯謨閣學士贈龍
圖閣學士諡曰正獻嘗曰此心存則雖賤而可貴
不存則雖貴而可賤吾心與天地一本精思以得
之兢業以守之則與天地相似每謂爲學當以聖
賢自期仕宦當以將相自任其所講明體用兼綜
於書禮論說尤詳成就後學甚衆子甫進士第一
爲兵部尚書國子祭酒亦稱名儒

沈煥字叔晦自定海徙鄞偉儀觀尊瞻視音吐鴻
暢羣居鄉校以嚴見憚入太學行藝優諸生始與

臨川陸九齡爲友一日盡舍所學師事焉晝夜鞭
策務本趨實不自矜衒第進士講學不倦自以資
稟剛勁非所以歡庭闈大書深愛和氣愉色婉容
數語于壁日觀省焉門人弟子決疑請益者自遠
而至啓告簡嚴中心悅服師道益尊爲太學錄修
教養法士爭歸之不詭隨苟容以取光寵遂補外
終于舒州通判煥非聖哲書未嘗誦習與朱文公
呂成公問辯凡世變推移治道體統明君賢臣經
綸事業孳孳講求日益深廣追贈直文華閣特諡

端憲

楊簡字敬仲慈谿人清明純一非禮不動燕私儼
恪如臨君師學以古聖爲的入太學第進士主富
陽簿日坐公堂輒諷詠魯論孝經不動聲色而民
自化陸九淵道其邑齒長二歲指以心學之要遂
北面師事焉調紹興府理椽朱熹持庾節首薦之
每稱簡學有爲已功夫宰饒之樂平謂教養茲邑
欲使邑人皆爲君子况學者乎誨之醇醇不倦爲
講堂訓曰學者孝而已矣時有古今道無古今性

無古今聞者興起以國子博士召講易乾卦發人
心固有之妙趙汝愚免相祭酒李祥抗疏辯之簡
上書亦以學黨斥間居十三年以秘書召遷著作
將作少監守温州訪賢者禮致之崇孝養明宗族
相卹之令首行鄉舉倣周宮敬敏任卹之類書善
不書惡除工部郎將作監告老奉祠召不起終敷
文閣直學士以寶謨閣學士致仕壽八十六諡曰
文元有詩易春秋論語古文孝經傳孔子閒居解
又著已易輯先聖大訓簡至誠篤敬基功之戚下

汨總麻一以經禮爲則而容色稱之平居接物從容和樂未始苟異於人而高遠自不可及北方傳誦其文曰此江南楊夫子也

舒璘字元質奉化人雅有大志恥以一善自名篤實不欺無毫髮矯僞入太學師張栻又從陸九淵朱熹及呂祖謙兄弟講習力於躬行嘗曰非能一蹴入其域刻苦磨厲改過遷善日有新得亦可以弗畔云爾第進士教授徽州以身率多士日詣學寒暑不懈暮夜亦間往勸誘啓迪質或不美未嘗

忿疾需其自新作詩禮講解以授諸生徽人追思之曰吾鄉學問之源窒而復通者先生實開之因祠於學璘信道甚篤利祿之念不萌宰平陽臨政聽斷人服其平終于宜州通判淳祐中特諡文靖

以上淳熙四君子

胡謙字牧之奉化人與弟誼師事袁燮傳陸象山學著易說易林若干卷誼字正之嘗內交蒙齋號觀省佚翁著尚書釋疑十卷觀省樵著三十卷兄弟文學爲鄉表儀

舒津字通叟奉化人讀書績學期至古人登景定三年進士第遷大學博士知平江蒞事勤敏雅志澹如嘗博采傳記著續蒙求尚書解春秋集註十
七史綱目從弟許字平叟清苦獨立景定元年入太學講明正學雖寒暑弗懈著易釋二十卷繫辭釋三卷讀史隨筆五卷心書六卷一門經學人謂得於文靖之傳

趙與憲字德淵宋祖十世孫初寓青田嘉熙中知平江府郡中饑分場設粥以寓公方萬理董其事全活數萬人行飲射禮于學宮廣絃誦以嚴教養學官子弟爲立生祠慕楊文元公簡倡道學於慈溪不遠千里因從弟與明詣門授業得其心學歷官司農少卿兼知慶元府沿海制置副使度地縣之湖北創立慈湖書院以崇祀之遂自青田就居慈溪累官至提舉洞霄宮贈少師謚忠憲
竺大年字耕道奉化人性行嚴重理學淹貫家法整肅鄉人歸敬受業沈端憲公煥所著有禮記訂義等書楊琪銘其墓

程端禮字敬叔鄞人別號畏齋學宗朱熹務適于用初爲建平建德兩縣儒學教諭歷信之稼軒建康之江東兩書院山長元文宗在潛邸遣近侍子弟來學賜以金幣牢醴禮遇甚至累考授鉛山州學教授鵞湖書院旁有道院一日見驢跑地驅去復來默卜而發之得十餘石碣刻羣賢像因立堂祀之秩滿以將仕佐郎台州路儒學教授致仕明守王元恭禮請爲學者師嘗謂門弟子曰學問之道具在聖經賢傳真知實踐則存乎人壽七十有

五忽病劇醫者進藥却之坐頃頭容稍偏門人告之復端坐而逝所著有進學規程國監頒之郡縣學有畏齋文集藏于家
程端學字時叔鄞人至治甲子會試第二授僊居縣丞未行尋改國子助教陞翰林國史院編修官每論撰爲學士虞伯生所推服中書選考鄉試號稱得人南宋間四明學者多宗陸氏惟黃東發史蒙卿獨宗朱氏端學與其兄端禮師蒙卿盡得朱子明體適用之指二難自爲師友端禮色莊氣和

善誘學者使之日改月化而端學方毅剛正一舉動必合禮法人以比河南程氏兩夫子云在國學時慨春秋在六籍中獨未有一定之論乃取前代百三十家折衷異同著春秋本義三十卷三傳辯疑二十卷或問十卷用經筵官請命有司取其書板行天下以授來學

劉希賢字仲愚鄞人少嗜學長從鄉先生薛觀學春秋博習強記爲文敏疾至順間中浙江鄉試復中春闈授太平路天門書院山長講論經傳得其

旨歸調長信州白石書院郡牧邑長咸就講焉後改會稽教諭見雅樂敝弛嘆曰聖人制樂所以格神人和上下定民志詎可闕哉乃捐俸率諸生命工修飭秩滿陞江浙儒學副提舉致仕所著有春秋比事併窩類藁號木石子人稱爲木石先生謝源父定海人閉門讀易能古文詞而尤邃於理學晚年好游山水興至則吟詩以自遣子應辰字濟明受父易得其指要用薦爲太子說書改無爲州學錄至正初解冠歸隱而終

鄭奕夫字景允鄞人宋丞相清之曾孫也幼穎悟絕人動止中矩度潛心性理講學績文克守清白嘗為慈谿麗水常山三縣教諭調徽州紫陽書院山長陞浮梁州教授所著有論語本義中庸大學章旨衍桂堂集若干卷稱為習齋先生

國朝桂彥良名德稱以字行慈谿人記誦敏捷及聞楊簡學益以尊德性為本仕元為教授因朝政不綱退隱田里

高皇帝召見特授太子正字賜宴與公侯列坐

日侍講讀上詔詞人賦詩賡歌彥良每先眾而就嘗進奏曰治道具在六經典謨訓誥願留聖意詩非所急也上深然之自是恩遇隆洽稱曰老桂而不名上嘗御大本堂彥良與秦府紀善林温入見上問之各以官對上謂彥良曰卿帝者師謂温曰卿王者師其各自重彥良感荷知遇知無不言每侍講必以二帝三王為本而折衷於孔孟要以明聖學格君心為務至於歷代治忽啓迪不倦誠意懇至凡所陳說無一不當帝心

上方以法繩下訪曰法數行而數犯奈何對曰用德則佚用法則勞法以靖民則民勞而弗靖德以靖民民亦靖於德矣 上深然之 上從容問曰人有過如何彥良對曰過雖聖賢不能免勿憚改者君子也又問仁者有好惡乎彥良對曰惟仁者能好人能惡人於是命東宮及諸王大書揭之奉天門 上語及三教彥良對曰治天下必法孔子洪武八年特授通奉大夫晉相府右傳 上親製手詔以孔子孟論之陞辭 上曰江南大儒惟卿一

人彥良謝曰臣不如宋濂劉基 上曰濂文人耳基峻隘不足取既侍王就國日以正大之學輔之王以綺衣鞍馬畫彥良像以賜後諸王府罷相府改彥良爲長史時已老王爲造安車奏令致仕彥良退作存養省察圖以進王揭諸座右以時觀省居無何詔彥良舉家還京師彥良條陳治道所急者曰法天道廣地利順人心養聖德培國脉開經筵精選舉審刑罰敦教化馭戎狄蒐賢俊廣咨訪凡十二事總名曰萬世太平治要策 上嘉納之

寧波府志卷三十一
以風疾賜歸卒于家所著有清節集清溪集柱笏
集老拙集和陶詩春秋詠傳於世平生見道純一
不以貧富動心仕止進退一委於義命與人交坦
坦施施命觴賦詩踔厲風生窮日夕不厭時以春
風和氣日之

王桓字彥貞慈谿人洪武四年有司以通經學古
薦于朝太祖高皇帝召見便殿問桓處鄉里好
惡何如桓對曰善者好之不善者惡之一言稱旨
上遂呼爲老學士乃命與尚書魏杞山錢惟明學

士宋景濂講論治道踰年授國子學正未幾轉河
南盧氏縣令政教一新民懷其德十二年致仕盧
人立祠祀之先是桓家居鄉人有不平事無大小
咸取決於桓無不得其情者遂稱爲明白先生其
所學不事章句務得於心識者謂其克繼虞賀杜
樓之絕學所著有明白先生集藏於家桓以孫來
貴贈都察院右都御史兼大理寺卿其室爲世
傳淳字伯厚鄞人世業儒父時以道學名淳幼有
成人志稍長知自奮嘗業舉子試不利即取所業

藁焚之益究經史百家言正以濂洛諸儒之說以窮性命道德之奧讀易至繫辭曰聖人以此洗心退藏于密拱手立曰淵乎休哉遂顏其室爲退密鄉人以退密先生稱之問學純正不求人知守令聞其賢每訪以治道必參酌古今以對至老不廢書一夕讀周禮漏下三鼓不置侍者請問淳曰吾樂此不知疲也就寢而逝所著有洪範敷言性理叢說大學補畧視志藁藏于家
倪復字汝新號畏菴鄞人性端謹嚴毅少力學無

間寒暑且勤劄記讀書不摘章摘句而窮索幽眇務得指歸嘗曰士生程朱後已幸有坦程矣更欲立門戶與抗邪故其說經談理止按先儒成法會而通之如辯大學親民叅之金滕新逆及析周程主靜主敬之說非徒言也爲門人講易及正蒙諸書詞旨洞達聽者莫不悟解尤邃於鐘律辯析名數鑿鑿中理潛思默會超然獨得故見人輒舉與義不啻懸河之注也平生篤於孝友親喪哭泣遂成目疾弟子束修之饋不入私室盡以資於弟檢

身以禮市肆優場不一履其足人嚴憚之或羣居
談謔復至則寂然斂聲師道甚尊而善引進名士
若通政余本邃理學有聲此其一也諸提學使者
咸加賓禮而內江劉公瑞尤爲篤異云所著有易
繫辭解中庸解正蒙發微皇極經世書通解鐘律
通考閒居漫讀記東巢樵著壺齋問答救災集議
禘禘議濬湖議見聞欄楯觀古錄畏菴存藁藏于
家

余本字子華鄞人生而英邁卓厲立志不羣讀書
不爲科舉文字之學終日危坐諷誦夜則焚膏以
繼自五經以至子史百家罔不鉤玄纂精其微詞
隱義人所不能測究者輒疑神窮繹必於悟解諸
先儒傳註錯出弗協于一反覆參互不會於意不
置已乃疏而辯正之凡天文地理鍾律象數悉研
其奧於張載正蒙尤深妙契蚤思夜索若有神授
之者一日行竹林中見一偉儒儼然衣冠以爲橫
渠先生也嘗言人對聖賢書則心明氣定即他玩
好不能入從此攝伏身心自然有益故其讀書一

字不苟一成誦即終身不忘及門之士屢滿其戶
誦解辯析悉竟指歸期於人人各充所欲時以余
夫子稱之所著有讀易備忘綱目備忘正蒙集解
皇極釋義律呂新書解禮記拾遺周禮考誤家禮
考異春秋傳疑孝經刊誤南湖文錄本初不爲有
司所物色年三十提學楊旦試以隱僻事輒大加
詫異謂必魁天下是年果領鄉薦正德辛未第甲
科第二授翰林編修時權姦迭興文事廢不用本
鬱鬱不得志力求補外授廣東提學副使至則以
釐俗作士爲已任振策風厲士皆雲起時潮州妖
巫托廟神以惑衆遂按除之壁立堅凝傾動僚案
有不合即義形於色因是與巡按御史毛鳳忤疏
其不法於朝而御史亦構本御史落職本亦謝事
家居數年絕意進取益受徒講說訓迪不倦嘉靖
丁亥復起山東督學陶範士類一如教廣東者陞
南京通政未幾卒本自幼篤孝能先意承志時或
聞戶外履聲意其父也佇立趨迎娶未數月值母
喪不入私室平居觥觥自持所交與不苟屑於阿

寧波府志卷三十一
軟庸下之流人多嚴之勇於臨義於得喪是非禍福一不置懷故能無所瞻顧若鷹攫瀾趨莫或牽掣家居食貧稱貸無虛月親族有急傾囊濟之或爲假貸而躬自償焉從兄弟早孤爲之撫養長復室之且給之田其他行誼不可殫述語在張尚書所爲志中

戴圭字秉誠鄞人潛心易學踐履篤實居常語人曰學要謹獨誠意以修身不怨天不尤人久之則與天一嘗揭諸屋楹曰人中合下渾無我地上元來都是天張尚書邦奇見而亟稱之其徒汪中丞王嘗言曰吾執業戴先生門時先生年甫三十餘貌甚莊氣甚和言甚簡重動止甚矩度讀書能精思其所造可謂深且微矣時所業不過時義而能不屑屑焉每迪玉古人之道至於今思其言不忘云圭性謹厚言動雍默衣冠儼然至時時與親友高會談道理論當世事竟日不休未嘗出一時俗語至易簣之日語子乾曰大學語孟首章皆是天命之性聖賢之言一轍也又曰我平日所著書却

是有用後來必有知者所著有易經大旨四書要
畧及要說等書藏于家人稱為野橋先生
司馬氏曰性命之學旨于宋儒朱陸之辯論之詳
矣吾明故多文學慶曆五先生為濂洛的傳淳熙
四君子則象山正脉餘皆羽翼二家各相師友若
後之君子振而起之俗學可廢矣

寧波府志卷三十終

寧波府志卷三十一

傳七

南京兵部尚書郡人張時徹纂修
寧波府知府蜀威遠周希哲訂正

文學

漢任奕鄮勾章人今其地為鄞漢御史中丞著書十卷
名曰任子三國時吳朱育稱為文章之士謂其立
言粲盛燁若春榮王十朋會稽賦亦云燁若春榮
則任奕虞翻

吳闕澤字德潤會稽餘姚人所居地今隸慈谿曰

闕峯曰德潤湖即其徵也家世業農澤好學貧而無資常爲人傭書以供筆札學既有成兼通曆數由是顯名察孝廉除錢塘長遷郴令孫權辟補西曹掾陟尚書中書令加侍中拜太子太傅領中書如故後封都鄉侯性謙恭篤慎官府小吏皆與抗禮口未嘗齒人之非權嘗問書傳篇賦何者爲美澤對賈誼過秦論最善蓋諷之也比卒權痛惜感悼食不下咽者數日澤以經傳繁多乃叅訂諸家刊約禮文及定見賓儀以便俗又著乾象曆數註

其容貌似不足而答問不窮虞翻稱之曰闕生矯傑蜀之楊雄又曰闕子儒術今之仲舒非溢美也虞翻字仲翔慈谿人詡之後自上陽徙宅勾章仕吳爲騎都尉數犯顏諫諍孫權不悅坐徙丹陽涇縣再徙交州權終踈之翻每自嘲曰爾踈骨節體不媚犯上獲罪當長投海隅翻有雋才文學優贍偉然名家雖不獲顯用稱儒宗焉其後預喜寄荔驚世基世南當九臯奕世貴盛皆翻之遺也

唐虞世南越州餘姚人

今爲慈地

字伯施翻裔孫爲叔

寄後性沈靜寡欲與兄世基同受學于顧野王餘十年精思不懈至累旬不盥櫛文章婉縟慕僕射徐陵陵自以爲勝已由是有名陳天嘉中父荔卒世南毀不勝喪文帝高荔行知二子皆博學遣使至其家護視召爲建安王法曹參軍時寄陷於陳寶應世南雖服除仍衣布飯蔬寄還乃釋布噉肉至德初除西陽王友陳滅與世基入隋世基辭章清勁過世南而贍博不及也俱名重當時故議者方晉二陸大業中累至祕書郎煬帝雖愛其才然疾峭正弗甚用爲七品十年不徙世基佞敏得君日貴盛妻妾被服擬王者而世南躬貧約一不改宇文化及已弑帝欲殺世基而世南抱持號訴請代不得自是哀毀骨立從至聊城爲竇建德所獲署黃門侍郎秦王滅建德引爲府參軍轉記室遷太子中舍人王踐祚拜員外散騎侍郎弘文館學士時世南已衰老屢乞骸骨不聽遷太子右庶子固辭改祕書監封永興縣子世南貌儒謹外若不勝衣而中抗烈論議持正太宗嘗曰朕與世南商

畧古今有一言失未嘗不悵恨其懇誠如此後數
直諫皆蒙嘉納嘗命寫列女傳於屏風於時無本
世南暗疏之無一字謬帝每稱其五絕一曰德行
二曰忠直三曰博學四曰文詞五曰書翰世南始
學書於浮屠智永究其法爲世祕愛十一年致仕
授銀青光祿大夫弘文館學士如故祿賜坊閣視
京官職事者卒年八十一詔陪葬昭陵贈禮部尚
書諡曰文懿帝手詔魏王泰曰世南於我猶一體
拾遺補闕無日忘之蓋當代名臣人倫準的今其
云亡石渠東觀中無後人矣後帝爲詩一篇述古
興亡既而嘆曰鍾子期死伯牙不復鼓琴朕此詩
復何所示邪敕起居郎褚遂良即其靈座焚之後
數歲夢進讜言若平生翌日下制厚恤其家子昶
終工部侍郎

五代林鼎慈谿人夜讀書每達曙善屬文能書得
歐虞法所聚圖書悉由手抄仕吳越自鎮海軍節
度判官累遷至丞相性讜正政事有不逮者必極
言之有文集卒諡貞獻

宋舒亶字信道慈谿人雋異爽朗博學強記爲文不起草尤長於聲律詞翰爲天下第一治平二年進士授臨海縣尉縣負山濱海俗多慆悍民有醉酒逐其叔母者至亶前命執之不服即斷其首投檄而去丞相王安石聞而異之欲召用丁外艱弗果熙寧八年入爲太子中允權監察御史裏行元豐四年自侍御史知制誥累遷試給事中直學士院制詞渾厚有兩漢風擢御史中丞奉詔舉御史十人皆稱職六年以論事坐廢崇寧元年起知南康軍出謀斬賊獲功居多二年朝廷遣使慰問除龍圖閣待制卒三贈龍圖閣學士所著有元豐聖訓三卷文集百卷

周鏐字廉彥鄞人銀青光祿大夫師厚長子也生而秀穎十歲如成人十四入太學力學勤苦登元豐二年進士第益究六籍諸子百氏之說悉論著其本旨爲文踔厲競爽超古作者不以絺章繪句爲工言必期于有用旁至天文地理罔不該博初調桐城尉辭不赴廼游穎昌訪舅氏范忠宣公時

文潞公司馬溫公富韓公皆在數得請益造詣遠
大國子祭酒豐稷給事中范祖禹交薦之後知南
雄以言邊事忤時相入黨籍退休西湖作四休堂
日與其弟承奉公藍輿野榜徜徉山水間時爲詩
歌自娛客至具尊俎隨所有殺斂終日談論古今
未嘗一語及官事所著有文集二十卷承宣集一
卷明天集一卷六甲奇書一卷尚書右丞胡宗愈
翰林學士王覲重其才相繼以女妻之蔡京作黨
籍碑婦翁舅甥入籍後以爲榮

劉涓象山人家業農奮志爲學鄰里哂之不顧登
元祐六年進士第授荆門軍長林令歷官至西京
留臺其讀書堂遺蹤尚存其族有劉遵字繼道博
學強記尤精於經術受業者不遠千里多所成就
紹興甲子己卯兼經取士與子該皆以詩舉該特
恩授文學

王次翁字慶曾先大名人曾祖昇甲科爲嘉岐王
府翊善因家濟南次翁崇寧進士通詩書春秋齊
魯諸生多從之游號兩河先生爲辟雖正有以次

翁所爲文薦于梁師成次翁詭取文以歸師成憾
之後知道州徙容州紹興初呂頤浩辟爲湖南叅
謀官作太玄九九畱布筭冥思潘良貴訪之聞其
籌聲視之乃太玄數也累官至御史中丞叅知政
事致仕居鄞子伯庠登紹興二年進士試教官第
一後擢殿中侍御史出爲夔路安撫性識敏絕夔
部曠遠伯庠手畱其險要夷人不能欺巴俗掠于
女出境特嚴其禁所著有歷山集雲安集宏詞集
要夔路圖經伯序亦登進士第官至正丞

林保字庇民鄞人登政和二年上舍第兩從廣西
帥辟主管機宜文字時將士率俘平民冒賞保覈
正之全活爲多家居十餘年安貧著書論夏少康
迄唐肅宗得失號中興龜鑑上之高宗敕書褒荅
紹興七年司諫陳公輔薦保可備臺諫秦檜沮之
止除提舉江東常平茶鹽九年入爲國子監丞遷
比部郎修定明州鄉飲酒禮頒行天下累遷權吏
部侍郎假本曹尚書十五年引疾以敷文閣待制
奉祠十九年卒累贈特進所著有文集三十卷行

于世孫祖洽歷官至戶部侍郎別有傳

高閱字抑崇唐宰相智周後其先繇廣陵徙居于
鄞弱冠入太學見楊時授以伊洛之學宣和間文
體習駢偶閱力變之紹興元年賜進士第執政交
章稱閱議論簡正明於治體可居經筵勸講五年
授祕書正字高宗手書中庸儒行以賜進士閱言
儒行多漢儒襍記中庸實子思所傳乞罷賜儒行
兼禮部侍郎後爲國子司業三舍學法皆閱所更
定以忤秦檜爲禮部侍郎尋罷歸鄉里絕口不言

時事作春秋集註推程先生本旨又集厚終禮一
編行於世朱文公定家禮多用之累官禮部侍郎
贈少師諡憲敏從子文虎翰林學士有天官書集
註文善官將作監文虎子似孫禮部郎中守處州
有緯畧騷畧等書文善子衡孫禮部尚書兼侍讀
楊琛字獻子奉化人負器識富文學紹興四年進
士嘗爲江東提刑司幹辦公事經學淵源鄱陽士
多師焉拜國子博士召試館職時韓侂胄專政遂
拂袖歸杜口不言時事端平初特官其子斯士

寧波府志卷三十一
趙敦臨字芑民鄞人紹興五年第進士初爲蕭山
縣主簿郡守使者交薦之爲湖州教授魏丞相汪
尚書皆其門人有語孟書禮春秋解王應麟嘗輯
其遺文爲之序曰斯黃收純衣之製大羹玄酒之
味也昔者子朱子謂前輩爲文明白磊落指切事
情無睢盱側媚之態愚於芑民見之

鄭鐸字剛中鄞人由福州徙鄞躬孝友之行貫通
經史以詞賦名于時後學多宗焉登紹興三十年
進士第仕至屯田郎寧宗在英邸兼小學教授嘗
進勸戒元龜後特加贈官其子沉

卞園字子車象山人性穎異於書無所不讀入太
學蜚騰英譽人號卞夫子登紹興三十年進士第
授揚州倅著論語大意二十卷行於世

樓昉字暘叔鄞人登紹熙進士與弟昞俱以文名
少從呂成公於婺其文汪洋浩博凡所論議援引
叙說小能使之大而統宗據要風止水靜泊然不
能窺其渙從學者常數百人最顯者鄭清之應儼
鄭次申趙與權尤善章表李壁黃裳爲侍從所爲

文俱出昉手宋世鄞士善論策台越進士歲率數十人來從學繇昉始守興化軍以卒清之既相追贈直龍圖閣率其弟子祭于墓後立甬東書院
史彌大字方叔鄞人忠定公長子力學勵行登鄭僑榜進士淳熙三年累遷祕書丞輪對上疏帝每稱善十有二年奉祠東歸特賜金帶紹興間進禮部侍郎封奉化郡侯食邑千戶先忠定薨所著有衍極圖說易學指要朴語二篇世家二篇及鏡庵叢書朴齋外集總若干卷

王休慈谿人攻戴氏禮慶元二年登鄒應龍榜進士擢湖州教授改新徽州遷祕閣校書判樞密院事直躬立朝無所附麗嘉定末與柄臣不合遂謝事歸一日上忽思之遣使驛召時休已卒乃命定海鎮營葬休以文學著稱一時士類宗之若杜洲童居易著作劉厚南右曹郎程士龍皆其門人晚歲文思益進金石文多出其手

張虛字子宓慈谿人唐建中宰相鎰之裔習詩易工詞賦登慶元進士教授臨江樓宣獻見而器之

寧波府志卷三十一
俾叔族子第暨爲翰林學士復舉以自代爲浙東
安撫使屬官帥檄處督漕剡縣處謝不往除太學
正叙遷博學時金將亡上疏言昔聞其衰則喜今
聞其衰當思蓋雖足偷一時之安而所當深防者
實在於自治遷祕書丞兼王府教授以疾出守南
康郡改處州政多惠利性澹泊奉祠家居端平元
年天子遴選經筵官以國子司業兼侍講召處講
月令至孟秋決疑訟反覆數百言復成月令解十
二卷以進陞國子祭酒工部侍郎麗眉冠帶諸生
望之肅如也壽八十卒諡文靖

余端臣字正君鄞人精毛氏詩以慶源輔漢卿爲
宗爲太學生歸教授于鄉從游者百餘人若王文
貫其最著者奉化汪元春慈溪黃東發俱私淑其
學遠近尊之稱爲訥菴先生而不名

王宗道字與文奉化人嗜古人之學窮恥討幽時
出其竒見人多稱之第嘉定元年進士爲江東提
刑司幹官所著有易說指圖十卷二禮說七卷書
說六卷觀頤悟言一卷讀詩臆說十卷襍錄二卷

聞見因筆二卷淮鹽論一卷詩文五十卷

應儼字之道昌國人第嘉定十六年進士未第時
袁越公韶爲京尹儼掌牋記留門下一夕坐有美
堂欣然若有得同門客最善樂府暮從外歸問曰
何欣然也以擬明堂詔書屬對甚善荅之客哂曰
一第脫饑寒猶未能明堂詔何施焉儼後直內制
卒用所擬詔而客以樂府游公卿困躓以死教授
臨安鄭丞相清之見其文竒之清之將拜相俾草
相麻後卒用焉儼以著作郎兼學士院權直端平

開邊兵敗洛陽儼預邊議坐斥而清之亦罷相居
東湖益與儼蒐拾文史號建章集皆制誥所需清
之再相儼復用以侍郎掌內制遂力薦爲內相理
宗疑焉一夕召儼入院降詔草五制夜四鼓進入
上始信之翌日即除翰林學士後拜叅知政事以
疾告歸卒

高元之字端叔鄞人武烈王瓊之七世孫建炎間
衣冠南渡父寓籍明州因家焉家貧無書得易編
口誦不輟數月忘盥櫛隣士憐之稍借之書後受

易春秋學于沙隨程迥時傳伯成爲郡教授少許
可折節與之交繇是鄉學者數百人師事之元之
作變離騷九篇曰愍畸志曰臣簿才曰惜來日曰
感回波曰力嗽曰危衷曰悲嬋娟曰古誦曰繹思
行於世宋儒擬騷弗能及也集春秋說三百餘家
號義宗悉本經旨凡百五十卷易詩論語後漢歷
志解各一卷詩三千襍著五百號茶甘甲乙藁五
上禮部卒不第將死手屬書樓鑰以歐陽公南省
白欄求誌文貧不能葬門人會葬于柅源鄉蔣山

買田立祠于寶嚴院歲時祀之號萬竹先生

王文貫字貫道鄞人蚤嗜學與鄉先生余端良遊
魁太學公試登寶慶二年進士教授真州除宗學
諭弟宗道同領鄉薦亦舉進士文貫精毛詩以輔
氏爲宗從遊常數十人同郡知名者奉化汪元春
慈溪黃震俱以論議政事稱于時文貫繇是顯名
黃應春奉化人嘉熙二年進士官至朝散郎知處
州壯遊京國四方之士翕然宗之著詩說內翰應
繇左史黃自然繳進送監看詳除國子錄

張良臣字武子一字漢卿家拱州父避寇來明州
因占籍焉善詩清刻高潔不蹈襲凡近音節悲壯
尤長於絕句語盡意遠後宋詩人咸推服之

王應鳳字仲儀鄞人與兄應麟麗講矻矻忘寢食
爲文根柢左氏班馬淳祐十一年廕補將仕郎明
年登文天祥榜進士監通州琅山稅寶祐間廷對
以甲科第九人賜第學益淹貫應開慶元年博學
宏詞科歷官至主管機宜文學尋除軍器監丞時
應麟方草制以嫌改差淮西制置司參議官未幾

文天祥薦其學宜職翰墨除太常博士以終壽四
十六所著有默齋藁及訂正三輔黃圖諸書

趙善湘鄞人由進士累官資政殿大學士後典鄉
郡卒贈少師有周易約說春秋三傳通義及詩文
百卷傳于世

黃叔英字彥實慈人先大父文潔先生宋寶祐丙
辰文天祥榜進士負材能尚氣節而甚邃於經術
嘗爲晉陵宣城蕪湖三學教諭又爲和靖采石兩
院山長叔英於經史百氏過目輒成誦爲文俊拔

偉麗意氣奔放若不可禦而要其歸能弗畔於道
有蕙菴下筆三卷詩文襍著總二十卷藏于家
王昌世字昭甫鄞人尚書應麟子恩補承務郎未
及祿而宋社已墟尚書公杜門不出朝夕坐堂上
取經史諸書講解論辨昌世甫十歲怡怡聽受無
倦殊聞異見靡不究悉尚書公所著述昌世蒐輯
考訂贊助爲多蓄書萬餘卷燬于火露抄雪纂至
忘寢食書以復完尤精於易筮占驗如神性至孝
友事許學士黃潛墓志中

元表士元字彥章鄞人宋忠臣鏞之孫自幼嗜學
講誦至廢寢食父母憐而禁止之迺端坐默記不
少輟長益旁搜遠輯務爲深博時守禮致郡庠爲
五經師學者翕然宗之監察御史奧林以茂才異
等薦授鄞學教諭調西湖書院山長改鄞山書院
未幾中書參政危素薦爲平江路儒學教授道梗
未上又用薦陞授文林郎翰林國史院檢閱官引
年弗就士元性至孝父澤民嘗患背疽士元吮之
即愈晚隱城西別墅種菊數百本號菊村學者所

著有書林外集行于世

鄭芳叔字德仲鄞人宋亡遍遊遺老之門博學廣
記家貧無書嘗假輿篇祕帙躬自繕錄積數千百
卷爲文一根於理不事浮靡從遊常數十人兩任
郡學訓導敦厚嚴重以道自尊而尤篤於倫理晚
年署郡學錄未上卒子覺民字以道積學累行名
並其父母嘗患日日以舌舐之即愈後病痲衣不
解帶父當葬適病痞甚劇人止其臨壙泣曰幸從
先人訖大事即道死無憾返而嗟薦陞龍游教諭

三月即棄去經畧使徵遺逸署婺處二州教授今
下以疾卒自號求齋有文集三十三卷次子昌世
字以文克紹家學不樂仕進隱居教授終其身

戴表元字帥初一字曾伯奉化人七歲學古詩文
多奇語稍長從里師習詞賦輒棄不肯爲咸淳中
入太學升舍登張鎮孫榜進士教授建寧後遷臨
安教授行戶部掌故不就大德八年執政薦起家
拜信州教授再教授婺州以疾辭初表元閔宋季
文章萎蕪骯髒慨然以振起斯文爲已任時王應

麟舒岳祥並以文學師表一代表元皆從受業焉
至元大德間東南以文章大家名者唯表元而已
其門人最知名者曰袁楠表元晚年翰林集賢以
修撰博士二職論薦不起有剡源集行於世

王惟賢字思齊鄞人嗜學博覽與弟惟義皆以儒
名性夷坦不拘細行家貧嘗求濟於友著春秋旨
要十二卷

袁楠字伯長鄞人同知樞密詔之曾孫幼穎悟絕
棄戲弄始從戴表元學績文脫去凡近長師王應

麟授以文獻淵懿深有悟造尤長於論史悉究前
朝典故叩之亶亶不倦嘗謂宋末文章弊濫益自
奮厲希古作者恥以門蔭補官初主麗澤祠塾大
德間用翰林承旨程鉅夫薦爲翰林檢閱擢應奉
尋除待制詞藝冠絕職內外制纂修累朝實錄多
裨國論累遷至侍講學士恬退歸里家舊有南園
去城僅二里而近構藝結亭其中扁曰芳思日延
親朋娛樂自號清容居士卒贈江浙行中書叅知
政事護軍陳郡公諡文清有文集五十卷刊于家

易春秋二解未脫藁楠年三十五妻鄭夫人卒遂
終身絕妾嬖介潔自持云

陳經字子經奉化人後徙姑蘇官至翰林學士祖
著宋祕監知台州晚居四明山中嘗本綱目著書
以紀歷代之統父泌元饒州教授表章家學訓釋
唯謹經自束髮受書即思弘前人之業乃敷筆記
二百卷又上論盤古逮于高辛會于有宋比事較
義尊正統以定大分其紀年師司馬公補遺其書
法師朱文公綱目名曰通鑑續編行于世

國朝鄭駒字千里鄞人持身修潔未嘗迹公卿門
爲文溫潤縝密洪武初聘爲郡庠訓導陞義烏教
諭以道淑人時宋濂自翰林歸里第見即珍重以
賓禮遇之卒于官第真字千之研窮六籍而尤長
於春秋旁及百氏傳記靡不究心元季科舉中廢
乃刻意古作草廬吳先生策問治道十二事對者
十不得一真荅之無疑滯國朝洪武四年中浙江
鄉試第一計偕春官罷再試授臨淮教諭秩滿入
見 太祖高皇帝賜宴命賦菊綻西風露脂風葉

詩稱旨陞廣信教授真自號榮陽外史嘗採摭鄉
先生言行文辭萃爲一編曰四明文獻又嘗類聚
諸家格言著爲集傳集說集論及禱著詩文六十
卷

烏斯道字繼善慈谿人文尚體要尤長於詩興寄
高遠而清灑出塵一掃元人過巧之弊宋景濂題
曰斯道之作俊潔如明月珠洶湧如春江濤其爲
名流推重如此尤精書法小楷行草各臻其妙遠
近求之屢常滿戶國初用薦起爲永新令有惠政

後以疾去官民遮留不可得爲立生祠祀之所著
有秋吟藁春草齋集子熙字緝之亦以詩文擅名
傅恕字如心鄞人與同邑陳剛借白衣僧舍習春
秋誓以科業自見遭元季兵亂終不克踐場屋所
積愈富洪武二年詣闕陳治道十二策曰正朝廷
重守令馭戎狄增祿秩均田園而蠲夏稅編民戶
而更役法黜異端易服制興學校慎選舉罷權鹽
罷權茶朝廷多嘉納焉預修元史事竣授保定博
望令政以躬行爲先而孳孳撫字有古循良風

寧波府志卷三十一
趙思盛字文祐一字師閏鄞人博物洽聞涉獵羣經而尤邃於春秋洪武初訓導郡庠八年遷教授啓迪不踰矩矱生徒景慕後引年歸里雖在耆耄書不釋手時稱邃於文學子世麟克紹先志十五年禮聘上春官擢監察御史有清白名

鄭本忠字本忠鄞人少篤學從鄉先生舒卓受伏氏書元季方氏據浙東三郡擅爵祿人本忠義不食其粟杜門不仕益務記覽涵濡停蓄爲文必中矩度時胡世佐林清叔楊彥常鍾士懋俱以文墨

自任皆與本忠莫逆洪武癸丑舉明經不起郡教授趙思盛薦授昌國訓導未幾縣革會稽郡博士王俊華延爲訓導秩滿陞秦府保安王教授卒于官所著有安分集子復言雍言復言舉永樂丙戌進士選翰林庶吉士讀中秘書鈎纂精微預修永樂大典應制賦白鹿稱旨授禮部主事陞員外郎郎中太僕少卿引年歸雍言舉乙未進士亦改庶吉士授中書舍人仁宗監國屢命賦詩頃刻立就尋命署禮部尚寶司及六科事上嘉曰卿不獨

文詞典雅作字亦端楷嚴密甚類爲人陞河南按察僉事 宣宗御極雅重其名留直文華殿日備顧問特賜給事牙牌以便出入陞太常少卿兄弟友恭無愧家學人稱二難

單仲友名佑以字行鄞人刻意問學自經史百氏以至周程張朱之書靡不深究爲文下筆數百言未嘗屬草士論推服然稟性落魄不矜細行家貧不治產業洪武六年偕慈谿桂彥良舉明經入覲太祖高皇帝敷陳治道咸切時宜上才之日留

侍左右以備顧問方將錄用尋以心疾放還田里十三年復召授國子助教改雲南大理府教授卒于官

王賓字用賓鄞人少卓犖不羣甫長博學強記貫穿經史百家避地村疇澹然自適號水村隱者洪武六年舉茂才以母老不起既終養復以文學薦授休寧教諭身率諸生竝竝忘寢食士不懲自勸秩滿考績廷試鍾山雨霽賦及羨鶴賦 上奇之命供奉翰林以老辭教授潯郡卒門人私諡曰清

節先生祠于學所著有書隱西上南游等集
崔植字斯立鄞人治春秋得聖人心法辨論公穀
左氏三傳得失歷歷如指掌究極羣史平居儀度
整肅不假修飾而規範自然洪武七年薦爲郡學
教授後調處州以成就後進爲務受業者日衆必
傾竭底裏隨其才而篤之卒于官植文學德行卓
絕流輩一時碩儒莫不想聞其風采自號丹山樵
者有襍著文集若干卷

余伯熊名夢祥以字行慈谿人敏慧越人落落不
與庸俗伍家貧好學寒暑不懈以詞翰著聞戴良
嘗寄詩云能詩不減唐工部解飲渾如晉步兵其
爲名流所推如此洪武十六年舉明經授宜都知
縣內艱服闋調知饒州安仁所至皆著能聲

時銘字季照以字行慈谿人少機敏好學能詩及
冠漁獵經史未嘗釋手爲文竒正間出變化不窮
希古作者洪武二十九年鄞學請職訓導已而赴
京和御製思得人詩 上獎諭凡兩召對特授監
察御史鞫讞平恕未嘗輕爲羅織以疾還里未幾

復用薦徵爲崇仁令痛革宿弊科徵庸調靡不究
心嘗置鋸箛於闔闔以槃其隱閭左安治而富室
有不利其均役者嚙之銘亦不自歎歷三考稱職
陞四川按察司僉事風裁益振嘗夢蒼顏縞衣授
以墨文思益進因號所著詩文爲夢墨藁行於世
蔣景高字伯尚象山人刻意問學與弟景武築室
山中朝夕講論凡經史曆數之學無不研綜爲詩
得古作者之趣洪武初薦授國子助教日擁臯比
訓以正學一時生徒咸底于成晚年自號丹臺外

史景武字伯承與兄自相劇切藝文精暢尤長於
詩有司屢以應辟召皆辭不就壽終于家

黃思銘象山人身不勝衣而倜儻好讀書問學充
裕詩章清麗纖美無山林枯槁之態得唐人標格
性復恬退不嗜榮祿洪武初累膺人材明經之聘
卒不起所著有東谷詩集方正學深稱之

王淮字百源慈谿人長身美髯儀觀秀整博極羣
書考索詳密錦衣指揮湯胤績亦以博覽善辯名
一日遇於湖州之慈感寺對語移日不相下及語

青陵臺事淮曰青陵臺有三而胤績祇得其二淮
歷歷口誦無所遺胤績嘆服翌日謂知府岳璿曰
百源行秘書也淮平生好作長歌下筆輒數十韻
造語奇麗擅名江湖間同邑都憲張楷嘗以詩贈
之有長驅文陣衝韓壁高立詩標上李壇之語年
八十而卒所著有大愧稿藏于家

胡庚字文剛鄞人幼孤天稟明粹悟解通敏從鄉
先生胡世佐授毛氏詩日與同里單仲友討論校
讐問學益以淵博敦行義遠紛華爲文冲澹純雅
工律詩文人學士過者無虛日洪武二十五年薦
授邑庠訓導後調四川安岳縣永樂十二年歸鄉
里優游山水間寓物寫興自目爲乾坤一腐儒所
著有雲屋集藏于家

黃潤玉字孟清鄞人五歲侍母病夜不就寢六歲
就塾坐立屹然不與羣兒狎書過目輒成誦十歲
行道見遺金不拾見者異之年十二聞郡守王璉
舉鄉飲酒禮就郡庠觀之默識其儀歸書于冊師
大奇之年十三時改元永樂命徙閭右實北京其

父當行詣官請代官少之對曰父去日益老兒去
日益長官異而從之踰年抵京受廩北城外十里
所沙漠寒沍無人煙潤玉與同役築室成比閭傾
貲給徭賦墾圃鬻蔬以爲生人不堪其劬瘁顧獨
安之稍隙輒肆力於學以已心爲嚴師而漸造于
聖賢擇然後語動無所苟京有富翁僅一女招潤
玉寓其家而同賈竟辭或問之曰瓜田不納履也
其慎行若此里中弟子多從之因敷且學補郡庠
生京闈鄉試擢禮經魁授建昌府訓導丁父憂改
訓南昌府學蔚有聲績用薦拜行在交趾道監察
御史劾權豪雪冤抑出按湖廣罪斥藩臬郡縣之
不職者至百有二十人威望赫然用楊士奇薦陟
廣西按察司提學僉事屏浮薄獎俊賢士風丕變
時寇起兵興吳都指揮妄掠子女萬餘口劾而歸
之副使李立入民死罪數百人亦爲辯而出之萬
口稱快南丹衛在萬山中瘴甚戍卒歲死或幾半
爲奏徙夷曠丁母憂改湖廣按察司布憲益嚴巡
撫都御史李賓張甚藩臬皆折節下之潤玉獨無

寧波府志卷三十一
加禮而連黜墨官二人又皆其鄉戚也故發憤誣
奏不諳刑律左遷和州含山知縣浚麻湖復逋租
闕蘆場革積弊均徭平訟民悅之請老致仕尋以
子隆貴封承德郎南京刑部貴州司主事閒居簡
出日惟玩味經義無厭平生註述甚富所著有儀
禮戴記附註經書補註學庸通旨考定深衣古制
寧波簡要志道德經陰符經註孫子兵法註南山
錄南山稿皆藏之家子隆字自立景泰甲戌進士
授南京刑部主事詳讞明允人以不究一夕獨坐

庭中有青囊從垣入詰旦持白尚書楊寧發之有
白金五錠則湖州稅長繫獄求釋者以故楊雅重
之陞廣東按察僉事後改福建悉心經畫多所興
建尋陞四川按察副使松郫隣於吐蕃軍糧仰給
內地率費十致一隆議開屯田以內糧易銀軍民
便之投閑二十餘年而卒有南谷稿若干卷藏於
家孫溥字存吾幼傳家學以貢授蕪湖訓導亦以
文雅稱曾孫巽字啓亨弘治壬戌進士授南京刑
部主事積資陞岳州知府至則清宿弊革姦頑門

無私謁苞苴不行性質直忤當路懇疏致仕不俟
報即行父老爲立石以識去思云

桂宗儒字文藪慈谿人膺貢預修永樂大典書成
授蘄州同知蒞官有善政然性直不能迎合監司
註其考曰學優政短還之吏部請改卑秩吏部侍
郎師道知爲彥良從子以善詩工楷書薦之文
廟召見即日拜修撰每應制有作爲時所稱

陳恭字莊仲慈溪人少岐嶷甫長雍默端重銳志
問學手不釋卷尤長於詩好納款賢士友人李善

好學而貧恭館于舍側始終無間有司辟爲羅源
稅課局副使卒于官恭爲詞賦格律清雅得唐人
之趣有閩中橐若干卷從子稅字孟藻自幼侍恭
講學論道日造高遠有司舉孝廉不起後復以聰
明正直舉授饒之德興令亦以文名

桂璵字懷英慈谿人倜儻不羣自幼至老手不釋
卷詩文充積縉紳士夫及門請益者無虛日相語
不以名氏尊之曰古香先生所著有桑榆橐

馮厚字良載慈谿人坦易不設機穽別號坦菴生

三月而孤比長事母至孝舉明經授學官歷遷淮王府長史嘗集文翰類選大成凡一百六十三卷以資啓沃善詩文多著述有洪菴彙中都彙南陽彙測蠡管見春秋卑論藏于家

周翰字維翰鄆人永樂三年中浙江鄉試明年會車駕臨太學獻賦稱旨詔禮部所選副榜士就廷覆試擢翰第一命進學翰林預修永樂大典七年除翰林典籍先是文淵閣所儲古今書籍歲久卷秩淆亂翰爲理葺逾二載秩然完整各書要旨輒

能記憶秩滿陞檢討預修兩朝實錄簡牘浩繁翰殫心窮力書垂成而病病既劇猶問史成何如言不及他事而卒翰爲文章根柢班馬出入韓柳歐蘇下筆頃刻千百言有文集藏于家

葉銘臻字維新慈人永樂甲申曾祭榜進士少以文名詩得盛唐風度每爲舉主解學士縉所稱賞時韓王素愛士一見悅之遂乞除爲府伴讀王改封於涼懇歸得允與祭酒陳敬宗齊名鄭珞來守郡造廬求見時銘臻杜門已久謝不出鄭曰來求

作府堂記耳何拒之深也乃出見權如平生延至郡齋援筆爲記鄭嘆服立碑堂隅其居家動遵禮度不威自肅士大夫語家法之善者以爲稱首所著有詩集二卷居家集三卷後子孫世登仕籍

夏時正字季爵慈谿人操履端潔不尚依違博學強記通經史百家文思紆鬱詩逼盛唐書迹亦遒勁登正統乙丑進士第授刑部主事再遷至郎中精於聽斷譽望籍籍陞南京大理寺丞歷少卿正卿操履不苟簡知當宁時遣十二使行天下考察

官吏臧否皆選廷臣官尊行直者時正分隸江西一時墨吏素聞威名皆望風解去而狡黠懷怨者爲飛語聞於上嘗所黜非公時正遂自劾請老其父與誠嘗居杭之仁和有田在橫水間時正就居之杜門讀書足跡不入城市營巢居閣於孤山時往憇焉凭闌送目屏絕世慮泊如也晚歲文益工人得之若珙璧藩臬諸公欲見不得每就咨焉平生大節高行如龍驤鳳舉爲後人所追仰所著瀛嶼稟一卷家禮四卷并詩文若干卷行世

洪常字子經鄞人性質高朗博聞強記不假師授典籍不給每借書友人所中正統戊辰進士觀政兵部尚書鄺埜侍郎于謙謂常有經濟才特疏授武選主事政不沉俗斷斷禁錯綽有餘才會土木之變埜死謙爲尚書時虜患孔棘奏對勦勦一以委常每入朝必佩筆札以從事至且語且疏即不草立上有貴州衛指揮李貴以罪戍欲關說復官常不可反誣常索賄詞連內子時內子寔不在官常不辯竟白已而進員外郎郎中 英廟復辟謙

死吏誣常爲謙黨 上特原之後誣常吏以姦欺當事者聞於常常曰彼罪當則可知以常故則不可竟以他事被擒時侍郎陳汝言素惡常不附已遂因都指揮李進事誣常入進賂 上亦置不問會西郵多故命兵部尚書馬昂往征之昂言部署乏人 上問洪常安在昂以憂去對詔起復之會與陳武平伯會訊夷人徒步往陳高其節以白金八十兩饋常買馬謝不受已而陳病亟復遣婿王誠致前金竟却之久之吏部擬陞方面昂欲薦爲

本部侍郎忌者劾昂私常遂乞骸骨後覃恩進階
朝列大夫歸田三十年非歲時飲射不至公府蕭
然一室左右圖書晏如也日以文翰自娛求者屢
滿其戶讀書務核奧旨爲詩冲淡典則所著有勉
學錄石田稿隨筆考文業考常爲人謙恭廉潔不
事家人產業重然諾抵人之急嘗捐俸歸僚友李
鳳喪倡義葬李主事山如其高誼類若此

魏備字達卿由郡庠生貢於春官廷試第一授石
城訓導自幼穎慧讀書日記數千言稍長博極羣
書以文雄於世爲詩希盛唐風格典雅不凡恒以
立言自許時與學士楊守陳守阯相和答甚器重
之備天性孝友動師聖賢平生不見疾言遽色與
人交温厚樂易至利誘勢怵則屹然山立不可動
搖其教石城以身爲範學者宗焉所著有經書僅
悟覈充子茶餘詩話聞見類纂小史雲松詩畧讀

史編

洪貫字唯卿鄞人隱士性子性素博學有文章擅
詩賦爲一時名公鉅卿推重貫少受性易學舉成

化丁酉鄉試除教鄧州益復肆力爲古文詞詩偪唐名家而賦尤有楚漢風格陞知從化已復改政和政和有紫陽西山遺跡貫因表章發揮以經學風勵多士士彬彬起然仕竟不進得下考以歸因擬杜秋興八首以見志傳至京師李東陽公大加賞異因別爲春興八首以續杜蓋慕擬之也晚結廬東野更號稼翁日哦其間取唐人詩和之殆徧好事者多傳至吳會間其士人莫不願拜下風或丐銘志譜牒以爲珍海寧新城江陰靖江四邑志

皆其手筆也前在鄧著易訓詁以授諸生嘗檄主江閩省試多得名士如汪俊輩人以爲具眼云貫年九十卒時猶不忘摘翰詩文流傳人間有周易解疑臥遊清嘯錄太白山人稿五十餘卷

馮忠字原孝慈谿人少孤力學工詩詞古文第進士爲刑部主事尋轉員外郎奉使陝西時三原王恕罷吏部家居忠以詩謁恕嘆賞不已使回適恕復起爲吏部首舉忠爲楊州守忠蒞官不事炫飾政簡而肅以微事左遷長蘆運同久之陞彰德知

府郡有韓魏公祠舊爲尼僧所據忠逐而復之勒
文以記昔謂其文可並羅池廟碑所著有松樵集
李麟字仁仲鄞人童時爲文輒奇偉不羣長遊郡
庠益肆問學尚論古作者尤好吟詠浸淫騷雅弘
治癸丑舉進士高第選工部營繕主事改兵部武
選主事進本司員外郎車駕郎中陞江西叅議至
則理刁訟恤滯獄除盜賊職業振舉正德戊辰入
賀至京逆瑾用事賂遺成市或勸借貸賂瑾可得
美秩且責償于民麟謝曰進退有命黷貨獵榮何

爲者哉時郡縣承風科歛旗校偵事交馳於道一
不爲意竟忤瑾罰米九百石瑾敗乃釋時寧藩恃
勢凌傲鎮巡以下無不折節而麟卒不爲屈陞廣
東按察副使勅董學政專務經術取士不尚華靡
以憂歸服闋復除貴州按察副使陞四川叅政署
理司事時有劉太監者奉命迎佛還自成都勢張
甚所至科擾無筭麟絕無餽遺省費巨萬陞貴州
按察使轉貴州布政使引年以歸杜門掩迹時繹
詩文非公事罕及公庭士友進謁者談論今古低

昂可否一不以情徇鄉黨皆宗之時或觸景感遇
逸興駿發輒爲題詠有心齋稿六卷

張琦字君玉鄞人自幼穎異年十二能屬對作詩
人語客有試者輒應聲出輒奇中家貧弱冠游學
吳楚間取束修以養親備極甘脆每誦讀至夜分
倦甚與其徒相喫水以醒醒則又誦讀爲舉子業
直寫骨髓率不類時人語故亦久不售弘治戊午
始獲雋明年第進士時年已及艾矣授南大理評
事歷陞寺副正慮囚多所平反有爲僞章者三人

罪論死琦廉其狀曰以竹布四邊中畫字成文非
刻印也遂得從末減司獄官以事落職貧甚至鬻
幼女作歸費琦即捐俸十金與之女得免鬻吏部
兩薦山西雲南督學使不果陞知福建興化府事
簡易清靜以儒飾吏興學校正風俗有古良二千
石風監司累上治狀竟以疾力乞骸骨陞本司左
叅政致仕歸二十年日惟以林泉雲鳥爲樂作詩
力去陳言務極玄遠雖一草一木必欲妙出象外
乃已自成一家言談者宗之有白齋集竹里集讀

史撮擇各若干卷行世

吳惠字仁甫鄞人少孤隨其母育異姓備嘗荼苦
穎異過人習記誦爲文章即越流輩年十七即敷
學自資弱冠遊無錫縉紳大夫聞其講經說理爭
致爲子弟師弘治戊午領鄉薦入國學國學師羅
整菴先生試權者聖人大用論亟歎賞令多士式
之正德辛未舉進士改翰林庶吉士授檢討秩滿
陞國子司業日會六館生講經書與義辨博詳明
六館生無不人人喜得師者嘉靖初 天子方嚮

用文學惠侍經筵日講多所啓沃陞南京翰林侍
講學士辛卯轉北主順天鄉試又侍日講講畢勸
上省無益之費停得已之役以惠斯民明日

上令輔臣問旨惠一一具上大見開納三年陞太
常寺卿掌國子監事乙未改南京太常寺卿病卒
惠自少熟蘇長公文每濡毫染翰酷相肖似大學
士李東陽楊一清常以東坡稱之惠亦以此高自
矜許或譏其不能進於古惠亦復譏曰經生學士
如好古者且就左氏司馬讀之何暇及我乎故其

文卒自成一家言在太學有經筵講義別有北川文集

華愛字仁卿鄞人甫成童輒博識強志甘苦于學年二十三舉于鄉甲戌舉進士授南京刑部主事歷員外郎郎中改南京兵部職方郎中出守桂林所至樹有勲績終以直道忤人被劾落職性溫雅清儉洞見肺腑不刻深懷詐家居鎮日以詩書自娛興至輒携其所知夷猶於廻溪疊嶂之間見雲蒸霧變木秀卉榮則忻然忘反置勢分於度外欣

然布素也精古書法尤工義獻行草爲詩希盛唐風格每以王維杜甫爲至入其閫域矣藻詞舒翰之士方共翕然向風顧不藥以死聞者傷焉其書跡流傳人間後學多宗之所著有石窓集

陸鈇字舉之副使偁季子甫能言母楊淑人命之以字百試不爽稍長慧智開發一目輒數行下爲舉業文精恪典雅大爲時輩所宗己卯舉于鄉庚辰會試中式辛巳廷對擢甲科第二拜翰林編修讀書中祕益銳志問學盡覽經史百家言儕輩素

以才名者皆詘下之尤砥礪名節以古人自期待時議禮諸臣故傾心於鈇欲引以爲重鈇卒不應其人以爲少已遂嚙之會預修武皇實錄成進修撰已而大禮告成議禮者秉樞修宿憾遂出爲湖廣按察司僉事職司江防時其署新設除戎禦侮簿書文牒皆創爲之而飭叙振刷憲度井井諸僚竊相與議曰嗟陸君老吏殆不如矣已而稍遷江西叅議職司糧儲輒能釐革宿弊盡徵諸所逋負又酌諸郡之贏縮驗物產之登耗而損益上下

之人人自以爲便已又稍遷山東按察副使職專學校自言曰尸祝代庖自今得少展其志乎乃明章程嚴品式正文體其雕蟲靡麗則黜抑之期不詭於大道所至敦尚孝弟分別義利才儻而行篤者引之若肺附士習爲之不變他如斥異端之祠以崇祀先哲乃其教之大者山東舊無通志則喟然嘆曰海岱山川之宗也聖賢人物之望也六經文章之祖也惟茲一方之志而天下古今之事備焉吾當殫茲役矣遂考古諏今補遺正訛窮日夕

不懈比踰年志成而鉞則病矣遂上疏乞骸骨其
畧曰臣自入東土荐罹愍艱一年而喪女二年而
喪妻雙樞在次幼子在抱又不幸有狗馬之疾願
微洪造敢丐餘生疏入不報遂卒鉞性資溫厚和
而不流口未嘗言人之短而剛大之氣侃侃不阿
犯履啗之戒曾無回忌卒坎珂以沒云鉞於書無
不讀爲文奧衍宏暢詩則溫醇而典婉蓄而諷有
晉唐之風有少石子集十三卷藏于家

王相字懋賢鄞人生而穎慧絕倫少受家學輒奮

勵誦習昕夕不懈稍長即沉酣經典鈎稽史氏而
力殫於淵學吐英擢華樹聲藝林名隱隱起矣嘗
授徒高錢山中每夜灼一燈琅琅誦不休飢則拾
蹲鴟火而啗之或竟夕不眠隣傭厭苦之竊議曰
何物怪孽欲以是博官邪聞之迄不爲止正德丙
子薦於鄉上春官不第卒業南雍大司成汪俊見
其文大奇之辛巳第進士選爲庶吉士讀中祕書
愈自刮磨茹荼攻苦如寒士爲文根柢六經而步
武乎莊列每意至即伸紙濡毫頃刻千餘言氣洶

洵不斷辟之騁逸驥而下峻坂也諸學士先生曰
奇哉士班馬不足爲矣壬午授翰林編修甲申以
議禮忤旨逮詔獄已而廷杖過楚竟卒時年三十
七有文集若干卷相素豪邁尚氣節初甚英毅中
更爲和易外不置畛域而內井井無親踈貴賤皆
爲推心焉其尤大者事親篤孝先意承志恒得其
懽心家貧屢空晏如也諸生束修之饋不絲毫入
私室里黨莫不稱之從第杰與相師資勤苦力學
舉丙戌進士任大名推官嘗署府事輒濬沐兒河
盡除貴戚之壅水爲利者民不病潦又嘗署開州
豪民號馬千頃者輿厚貨爲饋輒發其姦寘之罪
以治行稱既徵召而卒所著有經濟總論十卷
姚涑字維東東泉司馬鎮之長子母張夫人夢五
色鳥投懷遂生涑及長狀貌奇偉資識過人膺正
德丙子鄉薦連不第益肆力問學嘗曰讀書當與
天下後世爭雄長一方不足爲也。皇上繼統臨
軒策士爲嘉靖癸未遂魁天下授翰林修撰爲經
筵講官積誠感悟脫畧辭華每進對稱旨歷陞春

坊諭德丁酉主北畿試得士爲多人方以公輔期
之會丁父憂隨以疾卒涑性孝友六歲喪母執禮
如成人事繼母無間言尚書恩蔭例以嫡涑讓繼
母第汲以悅親心涑讀書務爲經濟事不拘拘文
辭如邊防海運皆有定議作諸邊圖時有翰林三
長之稱謂經學政事史學也有明山集若干卷門
生楊維傑哀其文爲之論曰涑六藝之芳潤獵百
代之英華發而爲文夸目愜心峻如喬嶽浩如長
江融如春陽烈如秋霜明與作者如公幾人人以
爲知言

陳束字約之鄞人生甫數歲穎慧絕倫日誦數千
言試之對輒應聲就數又奇中時已迥見瑰特譽
流縉紳間會會稽董少宰玘亦自奇其女不易匹
徧擇才秀異等者一見束大奇之輒字焉弱冠遂
與計偕策進士高第入翰林讀中祕書乃盡覽墳
索及諸子百家言又精古文詞視時輩若齷齪不
足與伍者以此頗自引重譏薄高貴人性亢潔自
喜嫉惡佞媚高貴人有欲款引終不一折節至其

門積久深心嫉之而儕輩亦多姍螯遂出爲湖廣
按察司僉事蓋困之也已乃移福建布政司叅議
又移河南按察司提學副使亦稍稍陟矣諸媚者
謂東獨能負氣骯髒持虛言彈刺必不肯抑心勵
志精會計聽斷修舉吏事逮其敗即擯之而東顧
獨能抑心勵志精會計聽斷益舉其職終無詞罷
免凡素所交游咸竊喜相謂以爲東不器如此也
方大望其成而東竟以劬瘁致疾嘔血卒東初事
諸生課藝已蘄然不爲猥瑣語時取古人書意所

契會即鈎纂精微時時論撰發舒淵懿上下屈宋
班馬之間向褒以下弗論焉作爲文章辭玄思深
葩藻橫發駸駸乎上廁於西京而天不來年不竟
所詣止知者憾之所著有后岡集蓋僅存十之一
二云時徹嘗爲之論曰以陳子之博洽高融洞古
聖哲之微言明習吏事其所厝注井井矣此與僕
邀膚凡無所比數者奚啻天壤已也彼其脂韋比
周改錯幸合胥以楊鴻漸之翼而享黃髮之期而
陳子徒以執萬履繩所在齟齬至憤恚而死年纔

三十三耳而妻子又無憑席之業則豈非定命之不移者邪抑或按刺刻深抗引太峻天忌其然乎王梃字子長象山人賦性明敏七歲解文義博覽羣書過目輒成誦爲文閎肆豪邁下筆滾滾不窮頃刻可就士類宗之嘉靖辛卯領鄉薦明年應禮闈試策名亞魁進對大廷萬餘言辭多剴切修撰姚涑謂王子長之策宜魁天下第讀卷諸公意見不同遂殿之耳是年觀政禮部值彗星變輒上封事有直聲甲午授中書舍人乙未捧詔諭江南

直隸諸郡所司率故事致贖一無所受丁酉選兵科給事中閣臣以吏部不先關白格不用改繕部員外郎進本司郎中時大工繁興歲計所費數百萬且議添顧夫役梃亟請于大司空遂止其議省國費以萬計舊諸省運木先於張家灣出水拽運以次入神木廠既完始取批廻動經歲月間有水溢漂木坐累死亡者梃憫之奏即水次設廠竹木至即入即與官解批廻公私便之遂以爲例陞江西左叅議提督糧儲行一條鞭法夙弊盡釐轉山

東副使兵備徐州造東門浮橋決碭山水甃沛縣
城賑蕭縣饑具有利澤如協勦山東妖賊謝漢紅
羅女尤其大者戊申陞湖廣叅政百姓遮留不得
方惜其去而御史巡按者以不下已爲憾疏詆免
官挺慷慨負氣家素清約不以懾志意即造次助
勦未嘗暫輟問學素善古詩文晚更精詣有漢唐
風格所著有涉江集徐徐集疏議稿同野遺稿
應雲鸞字瑞伯象山人父振肅邑庠生經明行修
篤於孝友年四十尚未舉子頗患之識者曰無憂

也君之德必昌后既而果得鸞生而穎異有大志
每詣父讀書處見墳典浩繁輒曰會須讀盡此書
方是男子父陰竒之甫長遂刻意淬勵六經子史
無不綜貫嘉靖辛卯領鄉薦辛丑登進士第出宰
臨川民慣囂訟逋負滋積素號難治前令惟鄞人
周相興利擿姦號稱神明餘多不振比鸞至禁姦
息爭不釐百度設三條法以清虛賄逃絕飛倒之
弊上之撫巡爲時成式築文昌堰疏千金陂建樹
聲樓添設巡司政績炳著甲辰夏旱苗且稿鸞芒

寧波府志卷三十一
四三
鞋徒步虔禱於戚姑井雨輒應歲復大有諳練明
斷當道每以疑獄下之訊多所平反民以不究戍
申陞車駕主事進職方司員外武庫司郎中時北
虜犯順數議征討防禦之計贊畫爲多是年冬丁
內艱歸會象始城形勢規制多出其經畫服闋赴
京仍補原任朝紳競譽謂有經濟之才方欲柄用
卒於官鸞儀觀修潔制行端嚴聞道甚蚤好古文
辭凡所撰著悉根本六經而步武於遷固理明詞
暢屏黜塵俗殆盡唐宋以下皆置弗屑也所著有

臨川集經書講意東塘轂音象川襍稿

司馬氏曰秦火之後典墳缺滅學士寡眇漢興百
餘年然後遺經稍出文學彬彬盛矣於時馬遷相
如雄長藝林而向褒之徒翼戴芳潤然東西二京
其淳漓龐雅亦有間矣任奕崛起東海倡吾明之
文獻晉梁間諸虞振藻世南寔最之自時厥後洪
響幾息有宋諸人翩翩軒翥鳴盛當代而追古大
雅未之有聞意者崇崇性命之學厭薄執文其時
則然乎袁桷表元時謂東南大家而迨茲昭代浸

潤右文之化幾二百年縉紳學士握管登壇夫豈少也然沐浴所聞體裁互異至正嘉之間始有祖構秦漢濫觴魏晉而幾薄唐宋以下近時崛起諸子蓋藝林之逸駕珍肆之球琳也使不頓足於短晷恢恢堂奧不允登乎語曰風軌德音爲世作範不可廢也

寧波府志卷三十一

